

Benaček Jan - Jovo

Dana 13.01.2001. godine oprostili smo se od našeg dugogodišnjeg radnika, rukovodioca prijatelja i kolege Benaček Jana – Jove koji je iznenada preminuo u 72. godini života.

Benaček Jan rođen je 24. aprila 1929. godine u Bileći od oca Milana i majke Anke. Geodetsku školu završio je u Sarajevu 1947. godine i prvo zaposlenje bilo je u preduzeću "Georad" koje će kasnije biti pripojeno Republičkoj Geodetskoj upravi pri Vladi Bosne i Hercegovine.

1962 godine formira se Geodetski zavod pa svi radnici geodetske struke iz Republičke Geodetske uprave prelaze u novoosnovanu radnu organizaciju. Ovo ističemo zbog toga da se vidi da je pokojni Jovo cijeli svoj radni vijek od 40 godina praktično proveo u jednoj radnoj organizaciji.

Kao đak prve poslije ratne generacije geodeta u kojoj je bilo njih 17, pokojni Jovo je posljednji iz svoje generacije koji nas napušta.

Karakteristika za ovu generaciju je da se školovala u veoma teškim poslijeratnim godinama, u vrijeme velike neimaštine i gladi. Odmah po završetku školovanja je počeo raditi pod najtežim uslovima kada se radilo čak i nedjeljom uz neograničeno radno vrijeme.

Trebalo je raditi na izradi geodetskih podloga za obnovu ratom porušene zemlje.

U toku svoga službovanja naš pokojni Jovo radio je kao izvođač i rukovodilac po cijeloj Bosni i Hercegovini.

Jan je bio ugledan domaćin svoje porodice sa suprugom Danom, kćerkom Rankom, sinom Predragom – Bengom koji su postali ugledni i vrijedni građani naše domovine.

Naročito je poznato Jovino zalaganje i podrška svome sinu Predragu u njegovoj sportskoj karijeri. Igrao je za KK Bosnu te za reprezentaciju i postao poznat ne samo u bivšoj Jugoslaviji nego u Evropi i svijetu.

Jovo je radio na klasičnom premjeru, a zadnje godine svoga rada na izlaganju. Za ove poslove su birani najbolji i najiskusniji geometri.

Naš Jovo je rano postao učitelj i rukovodilac mladih geometara. Često je imao uzrečicu "devetični ostatak" što je karakteristično za njegovu duhovitost i bio je obljubljen kod kolega.

Za svoj rad je bio pohvaljivan i odlikovan više puta. Ovom prilikom izražavamo saučešće njegovoj porodici i kolegama.

Za sve što je učinio neka mu je velika HVALA i VJEČNA SLAVA.

Kolektiv Geodetskog zavoda – Sarajevo